

**TEZAU LITURGIC**  
**14 FEBRUARIE**

**ACATISTUL**  
**SF. CUVIOS**  
**MARON**  
**DE LA**  
**CIRUL SIRIEI**



**MOSCOVA, 2000**



# Акафист преподобному Марону Пустыннику Сирийскому

## Кондак 1

Избранный угодниче Христов и чудотворче,  
преподобне отче наш Мароне, похвальное пение  
приносим ти, любовьи чтущии твоя подвиги и  
труды, ими же Богу угодил еси, от Него же и дар  
исцеления недугов приял еси, яко имеяй  
дерзновение к Подателю здравия, от всяких нас  
бед и болезней свободи, да зовем ти:  
Радуйся, Мароне пустынниче, скорбных врачу и  
иноков наставниче.

## Икос 1

Ангельский нрав имел еси, отче преподобне, и  
яко бесплотный, непорочное житие совершил  
еси на земли, дивный образ совершенства  
духовнаго нам оставив, да подражаем  
добродетелем твоим и зовем ти сице:  
Радуйся, от юности Господа Единого всем  
сердцем возлюбивый;  
Радуйся, вся красная мира сего нивчтоже  
вменивый.  
Радуйся, постом и бдением молитвенным плоть  
твою удручивый;  
Радуйся, непорочный сосуде Божией благодати.

Радуйся, жилище Духа Святаго, украшенное чистотою;

Радуйся, мужу желаний духовных.

Радуйся, главо, освященная десницею

Всевышняго;

Радуйся, безмолвия рачителю.

Радуйся, молву суетную возненавидевый;

Радуйся, богомыслия вы́сото.

Радуйся, Сирийския страны прозябение святое;

Радуйся, Церкви Кирския красото и похваление.

Радуйся, Мароне пустынноиче, скорбных врачу и иноков наставниче.

## **Кондак 2**

Видя Господь душу твою яко ниву благовозделанную, к плодоносию духовному, к исканию единого на потребу направи твой помысл, преподобне. Тем же любви ради Христовы мир оставил еси и всякаго пристрастия суетнаго свободився, притекл еси в пустыню Кирскую Сирии Евфратской на подвиги иноческия, зовый спасающему тя Богу: Аллилуйя.

## **Икос 2**

Разумом богопросвещенным познал еси суету мира сего и непостоянство, в нем же радость сменяется скорбию, благополучие - нечаянными

бедами. Тем же вечных благ возжелал еси, отче преподобне, и сия взыскати потщался еси отречением мирских благ и вольною нищетою, подвизая нас звати тебе:

Радуйся, пустынного безмолвия любителю;

Радуйся, смирения и нестяжания рачителю.

Радуйся, истинного самоотвержения совершенный образе;

Радуйся, иноческаго равноангельнаго жития всеизрядное явление.

Радуйся, правило веры и благочестия;

Радуйся, зеркало терпеливаго послушания.

Радуйся, слезы духовныя стяжавый;

Радуйся, плачем временным блаженство вечное снискавый.

Радуйся, молитвами непрестанными прилоги вражия сокрушивый;

Радуйся, бдением и трудами плоть твою духови покоривый.

Радуйся, постом и воздержанием страсти укротивый;

Радуйся, суд Божий и муки вечныя приснопамятовавый.

Радуйся, Мароне пустынниче, скорбных врачу и иноков наставниче.

### **Кондак 3**

Силой Всевышняго осененный и укрепленный, в иночестем пострижении власов главы твояе все

плотское мудрование отложил еси, преподобне, и яко воин благоискусный, власяницу иноческую в броню спасения стяжав, и непобедимым оружием Креста Христова вооружився, крепко ратовал еси противу врага невидимаго, диавола, смирением глубоким побеждая его вознесенную гордыню и выну вопия ко Господу: Аллилуйя.

### **Икос 3**

Имея помышление о совершенном отрешении от соблазнов мира сего, пришел еси в пустыню суровую сирийскую, обрел еси тамо гору высокую, на ней же древле требище идольское бяше, и Богу освятив, в нем пребывал еси, имея небо покровом и землю одром упокоения, и кожаныя ветхия ризы одеянием многотрудному твоему телу, зноем опаляемому и мразом померзаемому, емуже ни малого угождения попускал еси, да не возобладает плоть над духом твоим, любовью ко Господу пламеневшим. Тем же зовем ти:

Радуйся, пустыню подвиги твоими освятивый;  
Радуйся, жестокое житие пустынное проходивый.

Радуйся, песнопениями немолчными Бога славивый;

Радуйся, молитвы непрестанныя Господеви возносивый.

Радуйся, постниче не изнемогая, былием  
пустынным питавайся;  
Радуйся, трудолюбче нелицемерный, праздность  
возненавидивый.  
Радуйся, многошвенная ризы носивый;  
Радуйся, в терпении и смирении преуспевай.  
Радуйся, равноангелен на земли бывый;  
Радуйся, презревый славу человеческую.  
Радуйся, сокрушивый сети фарисейского  
тщеславия и гордыни;  
Радуйся, поправый высокоумия душевредную  
прелесть.  
Радуйся, Мароне пустынночине, скорбных врачу и  
иноков наставниче.

#### **Кондак 4**

Буря искушений и устремлений диавольских не  
возможе поколебати храмины твоя душевныя,  
преподобне отче, основана бо бе на твердом  
камени веры во Христа и хранима трезвением,  
трудами и молитвами непрестанными, ими же  
непрестанно противоборствовал еси врагу рода  
человеческаго на месте древнего владычества  
его: тем же и ныне к тихому пристанищу  
притекл с лики искупленных в мире,  
победивших же мир, вопиешу Христу: Аллилуйя.

## Икос 4

Слышавше мнози о богоугодном житии твоём, отче Мароне, прихождаху к тебе, ови послушати поучений твоих душеполезных, ови же иночествовати с тобою в обители твоей пустынной, их же ты с отеческою любовию приемля, руководствовал еси стезею правою ко спасению, яко всем звати тебе:

Радуйся, веры истинныя правило;

Радуйся, кротости духовныя образе.

Радуйся, человеце Божий, преподобием украшенный;

Радуйся, воине Христов, полки невидимых врагов победивый.

Радуйся, мира дольняго мудрый странниче;

Радуйся, мира горняго достойный насельниче.

Радуйся, в добродетелех благоискусный подвижниче;

Радуйся, сопричтенный к лику великих пустынножителей.

Радуйся, богомудрый множества сирийских иноков начальниче;

Радуйся, многая души человеческия Христу уневестивый.

Радуйся, мнозии монастыри руками ученик своих в сирийских пустынях учредивый;

Радуйся, великий авво множества отцев.

Радуйся, Мароне пустынноиче, скорбных врачу и иноков наставниче.

### **Кондак 5**

Боготечное светило быв, всех к Солнцу Правды Христу путеводил еси, угодниче Божий, словом и примером жития твоего святого, еже все посвящено бысть на служение Богу и ближним твоим. Темже блаженство со святыми унаследовал еси и с ними вечно поеши хвалебную песнь Спасителю Богу: Аллилуйя.

### **Икос 5**

Видевше Ангельстии чинове равноангельное житие твое, отче богоблаженне, смирения твоего глубину, молитвы неотступность, воздержания твердость и велию ревность духа твоего о чистоте, удивишася и прославиша Человеколюбца Бога, укрепляющаго немощное естество человеческое. Мы же ублажаем тя и зовем:

Радуйся, светильниче пустынный, просветивый страну Сирийскую сиянием твоих добродетелей;

Радуйся, монашествующих дивное украшение.

Радуйся, цвете благоуханный пустынного прозябения;

Радуйся, древо благоплодное небеснаго насаждения.

Радуйся, преподобием и правдою одеянный;

Радуйся, союзом добродетелей удобренный.  
Радуйся, помазание приемый Святаго Духа;  
Радуйся, освященный сосуде благодати Божией.  
Радуйся, рабе Христов благий и верный;  
Радуйся, слуго Господень истинный.  
Радуйся, заповеди Господни исполнимый и оным  
научимый учеников твоих;  
Радуйся, великий учителю иноков  
пустыннолюбивых.  
Радуйся, Мароне пустынночиче, скорбных врачу и  
иноков наставниче.

### **Кондак 6**

Проповедник был еси евангельских добродетелей  
братии твоей, преподобне отче Мароне, и чада  
твоя духовныя верно руководил еси к вышнему  
Сиону, идеже есть жилище всех спасенных  
милосердием Христа Бога, пришедшаго в мир  
спасти падшее человечество и давшего Своя  
спасительныя заповеди во спасение всем, иже  
подобно тебе, возлюбиша Его сердцем чистым и  
навыкоша пети Ему: Аллилуйя.

### **Икос 6**

Воссияв в пустыни твоей яко богосветлое  
светило, отче наш Мароне, светом добрых дел  
твоих озарил еси души и сердца человеков,  
искавших от тебе наставитися во спасение:  
мнози бо ведяху тя равноангельна житием и

прихождаху к тебе, да слышат от тебе глаголы живота вечнаго. Тебе убо, святому учителю небесныя истины, сотворшему и научившему, и мы смиреннии зовем хвалебно:

Радуйся, Евангелия Христова немолчный проповедниче,

Радуйся, апостольских преданий ревностный хранителю.

Радуйся, Православия святыя догматы в душе твоей добре утвердивый;

Радуйся, верою правою и делы благими Богу угодивый.

Радуйся, во след себе собор учеников твоих ко Христу приведый;

Радуйся, с ними, яко отец со чады, прияти почести небесныя от Господа возшедый.

Радуйся, не скрывый талант, тебе врученный Всевышним Домовладыкою;

Радуйся, куплю многу им сотворивый, спасение душ человеческих.

Радуйся, яко твоими ученьми грешнии покаянием Богу угодиша;

Радуйся, яко твоими наставленьми заблудшии правый путь спасения обретоша.

Радуйся, ближния твоя искренне возлюбивый;

Радуйся, спасению их душевному усердно послуживый.

Радуйся, Мароне пустынноиче, скорбных врачу и иноков наставниче.

### **Кондак 7**

Хотение едино имел еси, преподобне отче, еже Богу благоугождати, и спасению душевному ближних твоих благочестно послужити, темже обитель твоя святая бысть пристанище благоутишное всякому человеку, треволением моря житейскаго утомленному. Ты бо, яко кормчий добрый, вся ученики твоя и приходящия к тебе люди наставлял еси словом и примером твоим вдали мира и сует его, сердцем и усты немолчно возглашати Богу: Аллилуйя.

### **Икос 7**

Новая звезда светозарная на тверди Церкви Христовой возсиял еси, богоблаженне отче, в пустыни в начале подвига иноческаго уединенно пребывая, в молитвах, лощениях и трудах непрестанных, еже видя Всевидец Господь, собра к тебе паству иноков пустыннолюбивых, иже хотяху жити с тобою и назидатися от тебе во спасение: и тамо среди разрушеннаго владычества древняго омрачителя языков, основал еси селение Богу Единому Истинному, обитель свою, яко крин в пустыни процветшую духовно. Темже прославляем тя сими достождными похвалы:

Радуйся, преподобне, святостию и чистотою  
светло украшенный;  
Радуйся, богоносне, дарами божественными  
свыше одаренный.  
Радуйся, пастырю добрый тобою собранного  
стада словесных овец;  
Радуйся, пустыню непроходимую в вертоград  
духовный трудами твоими претворивый.  
Радуйся, вся страхования и привидения вражия  
молитвами твоими посрамивый;  
Радуйся, нищий духом, но многих богатящий.  
Радуйся, постническаго лика украшение;  
Радуйся, звездо сияющая в сонме преподобных.  
Радуйся, яко тесный и прискорбный путь паче  
пространнаго возлюбил еси;  
Радуйся, воздержанием вся страсти  
умертвивый.  
Радуйся, прежде умертвия твоего мертв бывый  
греху;  
Радуйся, плоть твою духови любомудренно  
покоривый.  
Радуйся, Мароне пустынниче, скорбных врачу и  
иноков наставниче.

### **Кондак 8**

Странное и преславное чудо видится всем  
притекающим к тебе, отче наш Мароне, яко  
дивно прослави тя Господь: приял бо еси от него  
дар демоны прогоняти, недуги врачевати,

скорбящих утешати, ожесточенныя сердца умягчати, да вси воспевают чудодействующему тобою Господу: Аллилуйя.

### **Икос 8**

Все твое, преблаженне и богоносне отче, тщание и все о том бяше попечение, да выну всезлобному рода христианскаго врагу сопротивлятися и гордую его злобу попирати дивным оружием смирения, поста, безстрастия, труда, молитв непрестанных с коленопреклонением и покаянными слезами, и сими сам улучив победу на супостаты, стяжал еси от Господа дар и всем от лукаваго стужаемым помогати. Помози убо и нам, отче преподобне, твоими молитвами противитися искушениям вражиим и подражати тебе в побеждении страстей наших, да зовем ти:  
Радуйся, смирением гордость душепагубную поправый;  
Радуйся, кротостию пламень гнева в себе погасивый.  
Радуйся, яко воздержанием и бдением целомудренно душу и тело твое соблюл еси;  
Радуйся, гордыни диавольстей низложителю.  
Радуйся, бесов прогонителю;  
Радуйся, силу вражию поправый.  
Радуйся, в силе Божией преспевавый;  
Радуйся, лжи лукаваго обличителю.

Радуйся, прельщения бесовскаго посрамителю;  
Радуйся, власть на духи нечистыя приявый.  
Радуйся, яко тобою гоними, тии из одержимых  
ими скоро убегают;  
Радуйся, яко бесныя, к тебе приводимии,  
здрави и смыслящии от тебе отходят.  
Радуйся, Мароне пустынночиче, скорбных врачу и  
иноков наставниче.

### **Кондак 9**

Всем приходившим к тебе, молитвы и  
благословения ради, преподобне отче, дивно  
бысть видети тя, в ветсей и многошвенней  
кожаней ризе ходяща и зело нищетно под  
древом или во дни болезни в пещере  
пребывающа, всех - богатых и убогих, вельмож и  
простых, равно с любовию принимал еси и  
коемуждо слово на пользу душевную изрекал  
еси. Смиренно молим тя и нам во дни напасти,  
искушения, недоумения и сомнений  
притекающим к тебе, возглаголи слово  
утешения, наставления и ободрения, да поем  
предстательством твоим чудодействующему нам  
Господу: Аллилуйя.

### **Икос 9**

Ветий премудрых превзошел еси, преподобне  
отче, благодатным помазанием словес твоих,  
ими же грешныя на покаяние приводил еси,

подвизающияся в добродетели укрепил еси, и всем путь спасительный ко Христу показал еси, по нему же сам неуклонно шествовал еси до блаженныя твоя кончины, достойный воистину похвал таковых:

Радуйся, Сирийския Православныя Церкви светильниче немерцающий;

Радуйся, и в Российстей стране яко целитель изрядный издревле чтомый.

Радуйся, во дни жития твоего на земли и язычники ублажаемый;

Радуйся, христианскому роду присное утешение.

Радуйся, любящим и чтущим тя ходатаю спасения душам и телесем здравия;

Радуйся, пустынный гражданине, грады и веси наполненный славою твоих подвигов.

Радуйся, маслино Божия благословения, ея же плодами напиташася вернии;

Радуйся, приведый ко Христу ученики твоя в добродетелех преуспевшия.

Радуйся, уготовавый житием и наставленьми твоими Господеви подвижники совершенныя;

Радуйся, полка иноческаго воевода благоискусный.

Радуйся, пустынножителей руководителю предивный;

Радуйся, храму сему, имени твоему

посвященному, покрове Богом данный.  
Радуйся, Мароне пустынночиче, скорбных врачу и иноков наставниче.

### **Кондак 10**

Спасти хотя многих к тебе прибежавших, не точию с тобою иночествовати хотящих, руку помощи милостивно подавал еси, но и различными мирскими делы, напастыми и скорбми отягченных и утесненных тако утешал, якоже родитель чада своя во обстоянии скорбей и болезней сущия утешает, отраду им своим попечением подавая и отеческою любовью тяжесть печалей облегчая. За таковое твое благодетельство и язычници нечестивыми чтом бысть, преподобне, вернии же, облагодетельствованнии тобою, благодарственно воспеваху Богу: Аллилуйя.

### **Икос 10**

Стена заступления быша молитвы твоя,  
чудотворче святыи, всем с верою к тебе притекающим во всякой скорби, ибо чистоты ради твоея сердечныя, сила духовная от Бога тебе даровася болящих исцеляти, бедствующим помогати, яко славити ближним и дальним величие Божие, в тебе явленное, и звати тебе сице:

Радуйся, сосуде, источаяй елей Божия

милосердия;

Радуйся, живоносный источниче, струи исцелений изливающий нам.

Радуйся, скорый возстановителю здравия в немощи лежащих;

Радуйся, всех недугов, паче же болезней лютыя трясавицы и огневицы, целителю.

Радуйся, сляченных и увечных здравых сотворивый;

Радуйся, печальных утешителю.

Радуйся, бедствующим на помощь ускоривый;

Радуйся, расслабленных благосердый укрепителю.

Радуйся, безмездный врачу болезней душевных и телесных;

Радуйся, подателю врачеваний всем, притекающим к тебе с верою.

Радуйся, совершителю многих дивных чудес;

Радуйся, яко обилие благодати Божия прияти сподобился еси.

Радуйся, Мароне пустынниче, скорбных врачу и иноков наставниче.

### **Кондак 11**

Пение всеумиленное Пресвятей Троице принесл еси при исходе твоём, преподобне отче наш

Мароне, и яко пшеница зрелая, во время пожатая, являя в краткой, но тяжкой болезни предсмертной и немощь плоти, и силу духа

своего, кончиною благою преселился еси от земли в обители горния, прияти награду от руки праведного Мздовоздаятеля Христа, Иже вчини душу твою со духи святых, немолчно возглашающих пред престолом славы Его победную песнь: Аллилуйя.

### **Икос 11**

Светозарный светильник Божия благодати, озаряяй Сирийскую страну, явился еси, преподобне, духовным сиянием подвигов и чудес просветивый пустыню и в ней обители иноческия многия устройый, и сие сияние твое духовное побуди святителя церкви Кирския почтити тя, авву знаменитаго и преславнаго, благодатию священства славы ради Церкви Христовой. Аще и тужаше дух твой, ужасаяся высоты сея, но смиренное послушание явил еси святителю и священства благодать восприяти не уклонился еси, подвизая всех согласно звати тебе:

Радуйся, место, оскверненное языческими идоложертвенными приношениями, освятивый совершением безкровныя Евхаристическия жертвы;

Радуйся, сея Божественный литургийныя жертвы достойный совершителю.

Радуйся, Алтаря Господня благоговейный служителю;

Радуйся, преподобне, руце твои со многим дерзновением ко Господу воздеявый.

Радуйся, молитвы теплейшия от сердца чиста к Престолу Вседержителя возносивый;

Радуйся, мастию священства умащенная главо.

Радуйся, вождю благоискусный воинов духовных;

Радуйся, свеще в молитве к Богу возженная.

Радуйся, маслино, елей милостей Божиих источившая всесильными молитвами твоими;

Радуйся, чаше, жаждущих утешения и врачевания напоившая.

Радуйся, даром чудотворения облагодатствованный;

Радуйся, телес наших благодатное богодарованное врачевание и о душах наших благоприятное предстательство.

Радуйся, Мароне пустынночеловеку, скорбных врачу и иноков наставниче.

### **Кондак 12**

Благодать, данную ти от Бога ведуще, радостно имя твое воспоминаем, преподобне отче наш Мароне, и с теплым усердием ко всечестному образу твоему притекаем, прилежно моляще чудотворения даром от Господа прославленного: подаждь цельбу всем болящим, наипаче же страждущим огневицею и трясавицею с верою к

тебе прибегающим, избави и всех нас от всякия нужды и печали, да поем Богу: Аллилуйя.

## **Икос 12**

Поюще славную кончину твою, стекошася ко гробу твоему иноков лица и верных множество и со благоговением подъемше святыя мощи твоя, изнесоша я в ближнюю весь, идеже последи создан бяше велий благолепный храм во имя твое, преподобне, в нем же и положены быша многоцелебныя мощи твоя. И мы молящеся в сем храме, имени твоему посвященном, предстояще пред цельбоносным образом твоим и частию святых мощей твоих, чудесы благоухающих, прилежно молим тя: услыши нас всегда, твоего предстательства просящих за скорбных, недугующих и страждущих, к тебе вопиющих:

Радуйся, дарования чудес исцеления исполненный;

Радуйся, печальных отрадо.

Радуйся, немощствующих врачу;

Радуйся, щедрот и милования струя неизсякаемая.

Радуйся, любви и сострадания явление обильное;

Радуйся, телес наших богодарованное врачевание. Радуйся, о душах наших благоприятное предстательство;

Радуйся, добрый наш наставниче.

Радуйся, о спасении нас грешных сильный ходатаю;

Радуйся, благосердый помощниче всех, благочестно совершающих память твою.

Радуйся, целителю наш скорый;

Радуйся, заступниче наш теплый.

Радуйся, Мароне пустынноиче, скорбных врачу и иноков наставниче.

### **Кондак 13**

О преподобне и богоносне отче наш Мароне Чудотворче! Приими сие похвальное пение, от нас недостойных во умилении тебе приносимое и не преставай молитися за всех недугующих и скорбящих, к твоему предстательству с верою притекающих, и подавай и всем нам твоими богоприятными молитвами вся благопотребная в жизни сей и к вечному спасению полезная, и сподоби вкупе с тобою во Царствии Небесном непрестанно пети Богу: Аллилуйя.

Сей Кондак глаголи трижды, затем паки Икос 1 и Кондак 1.

